

# O LE SULU SAMOA



EKALE SIA FAAPOTO POTOAGA KERISIANO SAMOA  
OLE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2020

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)

**FAAPA'IA MAOTA EFKS NUUFOU, FALEATA.**



**AUE! UA MALILIU TOA, UA MĀUMAU AI AUUPEGA.**



**APELU LELEVAGA FTP**  
**(19/9/1941 - 19/4/2020)**

**FU'AOLEMALO JOHNSON**  
**APELU LELEVAGA**  
**(1/8/1948 - 29/6/2018)**

*"O i latou ia o e o mai nai le puapuaga tele, ua ta foi o latou ofu, ma ua faasinasinaina o latou ofu i le toto o le Tamai Mamoe...ina ulufale mai ia i le fiafia o lou Alii."*

(silasila itulau 9)

# **FAASINO UPU**

<b>1.</b>	<b>OLE LAUGA</b>	<b>2</b>
<b>2.</b>	<b>MAOTAEFKS NUUFOU</b>	<b>3</b>
<b>3.</b>	<b>NAO AFIOGAE TULEI</b>	<b>4</b>
<b>4.</b>	<b>OAUAFIOGA O LE SULU</b>	<b>6</b>
<b>5.</b>	<b>AUE UA MALILIUTOA</b>	<b>9</b>
<b>6.</b>	<b>FETUUTUUNAI MUNIAO</b>	<b>10</b>
<b>7.</b>	<b>O E UA FAI I LAGI</b>	<b>12</b>

## **OLE LAUGA**

(E sui ai le Lauga na atofa; ua lē gafatia ona o aafiaga o le Faamai Covid-19)

Tusi Faitau: Luka 24:28-35; Ioane 20:26-29

Matua: Luka 24:31 “*Ona pupula ai lea o la'ua mata, ua la iloa o ia;*”

### **Manatu Autu: Eseta: I le oso a'e o le la.**

O le Eseta o le vavega i le oso a'e o le la; o le taeao nai le tuugamau tu'ufua, tolu aso talu le taeao nai Kolokota. O le vavega na fai e le Atua i le taeao segisegi, na ala usu ai tina e molimauina le toilalo popo o le oti ma le tuugamau. O le taeao o le amataga o le vaisapati, le aso muamua poo le aso lona valu. Ua tatou masani ma le tala ofoofogia o le Eseta, le Tala Lelei e faamanatu i tausaga taitasi, e momoli mai ai le tala fiafia o faamoemoega lelei e taunuu i ai le Kerisiano faatuatua i tua atu o le tuugamau. O le vavega autu lea o le Eseta, le toe tu o Iesu.

Ae fia tuliloa isi vavega na tutupu mai ai i le vavega autu lenei; o isi vavega e fai ma molimau, i le oso a'e o le la, i le soifua o le tagata ua fanaufouina ma faaolaina. Vavega e pei o lea na tupu i le ala i Emau, i lea lava aso na toe tu ai Iesu. O le savaliga a Kaleopa ma lana pa'aga, ae faatasi ane i ai Iesu. Na alu le solo a o faamatala mea ofoofogia o tutupu i Ierusalem faasino ia Iesu le Nasareta. Le tagata e ofoofogia lona mana na fai ai vavega e tele; e ofoofogia lona alofa na mapu ai soo se ituaiga puapuaga, o e matitiva, sauaina, mama'i, e oo i e na oti, na faaolaina uma e Iesu. E ofoofogia lea alofa,

ae ofoofogia le mata'utia o le tali atu a tagata, e tali i le teena, agaleaga, faasatauro ma fasioti. Ae sili ona ofoofogia le tala i fafine na o e asi le tuugamau, ae tau atu ua leai se tino, ua toe tu Iesu. Mulimuli ane ona faamatala otooto lea e Iesu o fuafuaga a le Atua mo le faaolaina o le lalolagi, lea ua tini taunuuma ia te Ia le Keriso. Fai mai Luka, “*A ua punitia o la'ua mata, o lea ua le iloa ai o ia e i la'ua.*” O le aso o mea ofoofogia tuufaafeagai. Fitu maila o savali, talanoa ma vaai ia Iesu Toetu ae ofo i le loto maa'a ma tauaso faaleagaga. Ua latou taunuui lo la aiga, fai le fa'aafe, ona ta'ita'i lea e Iesu la latou Faamanatuga - ua tago o ia i le areto ua faafetai, ona tofitofi ai lea ma avatu ia te i laua. “*Ona pupula ai lea o la'ua mata, ua la iloa o ia; a ua mou o ia na ia i la'ua.*”

O le upu o faamatala ai le to'alua lea ina ua aga atu Iesu a alu loa fai mai, ua la '*pulunaunau*' ia te ia. E manaia le pulunaunau ae o le naunau faa Maretia, i mea'ai o le tino, ma fia faalogologo i talafou faasalemausau, ae lē ia fafaga ma'ona le agaga. Fai mai, “*E le'i mu ea o ta loto i totonu ia i ta'ua..?*” Sa ‘ite’ite ae le’i mautinoa; sa pei o le galu na ona faafua ae lē fati, poo le ao na ona faauli ae lē ūa. E mu le loto, e velasia ma asu faa-sulu aulama, ae le’i ‘a’asa ma sasao le talalī, ia mu saesae mai le afi o le Agaga Paia. Seanoa le tofitofiga o le areto - o le sakarameta faapupula agaga ma fai vavega - ua manatua ana folafolaga ma a’oa’oga, ua manatua e le o le satauro le i’uga, ae o le Toetu. Ua pupula ai mata, ua oso a'e le la, ua tutupu vavega i lo la'ua soifua; o le Kaleopa ma le pa'aga ua toe fananau, o foafoaga fou ua gaosia i le mana o le Vavega Autu. E tele fa'aaliga o Iesu Toetu, ae ua aumai le tala i le toalua lenei, ina ia a’oa’oina ai e mafai ona tautala ma gagana faa soo o Iesu, ae goto pea le la, o loo ola pogisa le vaai, e le’i pupula mata faaleagaga, e iloa tino ai le Iesu Toetu ma lona manumalo. E ao ona o gatasi le futia ma le umele. Ia fuifuihua le vavega autu o le toetu o Iesu, ma le vavega o lona toe tu i totonu o le loto ma le agaga o tatou le au soo. Auā e ese le fuliesea o le ma'a nai lona tuugamau, ae o loo punitia pea o tatou loto i papa ma ma'a o le lalolagi.

O lea foi le faamoemoe o Ioane i lana ia molimau - o le toetu o Iesu e lona valu i ai faailoga e tusa ma lana faasologa. Sosoo mai ai le vavega ia Toma Titumo; le soo na fai mai i le Aso Sa talu ai, e lē talitonu seiloga e tuu ona lima i mea na tutu'i ai fao ma le tao. Ua aulia le ulua'i aso o le vaisapati, lona valu o aso talu le toetu - valu aso o faalogo ae lē au talitonu lava. Seia oo ina fa'aali faapitoa Iesu mo ia, ua talitonu ai ina ua vaa'i mata'utino, "Lo'u Alii e, ma lo'u Atua e." O le ta'utinoga faa-asovalu, o le oso a'e o le la o le foafoaga fou, le vavega ua faia mai le vavega autu. E le gata ia Toma, ae faatasi ma i latou uma e faatuatua, e ui ina e lē vaai. Amuia i latou e faapea, auā ua Eseta aso uma, ua toe tu ai le Keriso ma soifua ai o Ia i totonu o le agaga ma ola ai. O Toma o se tasi o le masaga, peita'i e le o fia ta'ua e Ioane le igoa o le isi soa, e pei foi o le igoa o le paaga a Kaleopa - o misiterio. O le faamoemoe o tusitala, e mo i tatou o faitau ai; ne'i tatou tautiga e su'esu'e po o ai, ae tu'u ane i ai lou suafa pe a e finagalo ai ma lo'u foi igoa, tatou te savalivali ma faasoa ma le Toetu, i le ala o faatinoga o feau ma molimau mo Ia.

Ua si'omia i tatou i nei aso i le mata'utia o le faama'i oti o le Covid-19, ua afaina ai soo se tafa o le lalolagi ma le EFKS. Ua lamatia le ola i le tino i vairasi. Ua faapea foi ona afaina, a'afia ma tofotofoina le ola faatuatua. Ua afaina au tapuaiga masani i Aso Sa, le folafolaina o le Tala Lelei ma Sakarameta paia, tainane osiga taulaga i le tautua tuavae masani faa EFKS. Ua taai faafala ou nafa faa ositaulaga ma lou faatuatuaga i pulega faalenuu; ua fesiligia lau auauanga faa faifeau ma matafaioi faa Eklesia. Ua fesouaina la tatou folauga i peau vale o le olaga, ua o mai faatasi ma fuafuaga, poloaiga ma tulafono e ono tafea ai i nisi mala faaopoopo ma puapuaga faasili. Ia mau pea lou faatuatua ma loto tetele; ia malosi le onosa'i ma le faapalepale, a o feagai ma taimi faigata. Faamalosi lau tatalo faatauanau, o soifua lou Alii. Ua oso le la, e le po pea le nuu. Ia pupula le agaga o lana Eklesia e silafia ai suiga talafeagai, ma le malosi e fai ai vavega e tatau, e tali atu ai i lu'itau o loo fa'aali mai i taualumaga o le soifuaga. Ae ao lava ina

faanati ae 'aua le faatuai, ne'i pei i tatou o Kaleopa ma le vaega e pupula ane mata ua tuai ua mou ese le Alii. Ia sili ona pei o lo la'ua le'i toe nofoa'i - ua tutu i luga e ui ina gagaifo le la, e ui ina mamao le toe foi pe fia maila, ae le toe faatali ua le toe fefefe, ua osofia e faatino le molimau atu i le upu ma le galue. Ia i le Atua manumalo Lona viiga. Amene.

FSulu.

(Lauga e sui ai le lauga sa atofaina mo le masina o Aperila, e lei taunu mai)

.....

## **FAAPA'IA MAOTA FOU EFKS NUUFOU, FALEATA.**

O le Aso Faraile 24 Aperila 2020 na faapa'ia ai le maota fou o le Faafeagaiga EFKS Nuufou, susuga Letaulau Poufa Pesaleli FS ma le faletua ia Tina. O le faletua o le susuga Ta'ita'ifono Fono Tele, afioga Susana T. Iosia na ia alalua le lipine e tatala ai faitoto'a o le maota ma ulufale ai mo le sauniga lotu. Ia silafia o le taimi lea o loo faamalosia le vavao mo puipuiga o le Faama'i Covid-19, na o le to'alima tagata e auai i soo se faapotopotoga. O loo faamamalu foi e le EFKS lea poloaiga a le Malo. Ona o lea, sa le'i auai le toatele o le Eklesia e molimau i lo latou aso fiafia, vagana le Faafeagaiga ma le Faletua, Faifeau Nofoaiga Iamafana Faauuga, A'oa'o Fesoasoani ma sui o le Komiti.

O le susuga Faau'uga Mata'utia FT le Toeaina o le Pulega Faleata Sisifo na ta'ita'i le sauniga, e siitia ai viiga o le Atua seanoa o Ia e le tau lau o le faamoemoe. Na faavae le lauga i le Manatu Autu o lena lava aso - Miti Pea. (Kenes 40: 5-11). O la le Toeaina, o Iosefa na ola i siosiomaga o miti, na oo ai i puapuaga, na oo ai i le maota o Farao ma le tofi maualuga i Aikupito. O miti na tapena ai o ia mo galuega lelei, galuega faaola; o miti na faailoa e le Atua, i ana fuafuaga mamao, mo le lavea'iina o ona tagata. E le fesiligia o le Atua na faapogai, na fesooota'i ma faailoa le uiga o miti; a o Iosefa foi i lana tali atu, na ala ai ona tino mai miti i mea tetele ma matagofie. E faapena foi i lenei aso, ua molimauina ai galuega tetele ma taugata ua faia e lenei Eklesia. Malo le fai miti lelei. Na faafetaia le Faifeau ma le Eklesia i le loto tetele ma le faatuatua, fai miti mo le galuega a le Atua. Na faamafanafana foi ina ia 'aua le gata ai, ae miti pea mo nisi mea lelei i luma mo le

(faauma itulau 6)

# **NA O AFIOGA, E TULEI MAI FOFOGA..**

## **AUMAI TAGATAIAIESU.**

1. “*Ua ia te ia foi le mana o le Alii e faamalolo i e mama’i*” Luka 5:17e.

Sa a’oa’o Iesu i le tasi fale i se tasi aso, ona o ane ai lea o tagata e to’afa o loo fata le tagata ma’i supa ina ia faamālolō e Iesu. Ua latou lē mafai ona oo atu ia Iesu ona o le motu o tagata, ona latou fe’ā’ei lea i luga o le fale, ua fai le avanoa ma tu’utu’u ifo ai le ma’i ma lona moega i luma o Iesu. Ona faamalolo lea o ia e Iesu. Fai mai le Tusi Paia, “*Ua ia te la foi le mana o le Alii e faamalolo ai.*” Sa i ai foi le au faresao i le fale i lea aso, ma sa i ai foi le mana o le Alii e faamalolo ai ma i latou, peita’i latou te le’i maua lea mana ma lea faamalologa. Aisea? Auā o ou uiga fa’alia ma au auala fa’aaogā e faalagolago i ai le i’uga o ou mana’o (your attitude and approach determines your results). O le manatu faamaualuga ma le faasausili – ua manatu ifo ua latou silafia lelei le Atua ma lona finagalo – o manatu ia e taofia le oo atu o le mana ma le faamalologa a le Alii.

Fai mai le apostolo o Paulo, “*Auā foi ua tala ’iina mai i tatou i le Tala Lelei e pei o i latou; a ua lē aogā le upu na latou faalogologo i ai, ina ua lē faatatauina ma le faatuatua i e na faalogologo i ai.*” Eperu 4:2. O i latou o ta’ita’i o le lotu e leai se ‘faatuatua’. Na o lo latou mana’o e talanoa ma Iesu i finauga faamataupu silisili, ae lē fia vaai i le mana o le Atua o galue, ma lē fia vaai o faamaloloina le tagata supa. O lona uiga e mafai ona ia te oe se mafaufau e tumu i mataupu silisili, ma se loto e tumu i le masalosalo, ma lē maua ai se mea e tasi mai le Alii. O loo faamauinā i le Luka 5, “*Ua silafia e ia lo latou faatuatua, ona fetalai atu lea o ia ia te ia, ... ’Ou te fai atu ia te oe, Tulai ia, ina ave lou moega, ma e alu i lou fale.’ Ona tulai loa lea o ia i o latou luma ua alu i lona fale ua vivii atu i le Atua. Ua matuā ofo i latou uma, ma vivii atu i le Atua.*” Lk 5:20-26. E ofo i le mana alofa o Iesu; e ofo foi i le ma’ā’o loto o ta’ita’i lotu Iutaia.

2. “*A ua o mai nisi...ua aumai le tagata supa, o loo fataina mai e le toafā.*” Mare 2:3.

E i ai nisi tagata seiloga e ‘fataina’ ona faato’ a oo lea ia Iesu; e lē mafai ona latou o ia te Ia na o i latou. O i latou ia e pei o le tagata ma’i i le tala a Mareko, ua faataotolia le tino, le mafaufau po o le agaga i le gasegase o le supa (gase/pē). Pe afai e fesili ifo, po o le a le mea ua supa/gase/pē ai? E lasi mafuaaga. Ua supa i se agasala ua lē mafai ona tu’u. Po o se talitonuga sesē faapea ua ‘ova au agasala e lē toe mafai e le Atua ona alofa, faaola ma faamagalo oe. Ua gase i mea na tutupu i lou olaga faa-tamaitiiti ma talavou, e te fefe e talanoa i ai. Ua pē ina ua pulea le olaga e fuala’au oona, o taaloga su’e tupe, o tala ma ata matagā i luga o fesootaiga tekonomosi, o le ‘ava malosi, o tupe, o mulilua, faitaaga, sauaga mataga ma isi anoano o soligatulafono ua faagaseina le ola.

O le a lava le faafitauli o loo ia pulea nei oe (addiction), o lana galuega o le faagase, faasupa ma faapē. E mafai foi ona faagase oe e le fefe, popole, pe losilos. A o le isi foi itu, e mafai ona supa i le loto fefete ua poto tele, ua tumu ‘oa ma tele tamaoaiga – ua lē toe manatu i le Atua, ua lē mana’omia se fesoasoani mai se isi. O i latou uma nei ua manaomia ni toafa, latou te fataina ia Iesu ina ia faamaloloina. Na amata le galuega a Iesu i lona fetalai, “*Ua i o ’u luga le Agaga o le Alii, auā ua na faau’u mai ia te a’u e folafola le Tala Lelei i e matitiva; ua auina mai a’u e faamalolo i e loto momomo, e tala’i le saolotoga i le tafeaga, ma ia pupula mata o e tauaso, e tuu saoloto i e ua faasauaina, e tala’i le tausaga e finagalo malie mai ai le Alii.*” Luka 5: 18-19. O le vaega mulimuli o le f.19 i nisi lomiga o loo faaliliuina faapea, ‘ua oo mai le tausaga e finagalo malie ai le Alii.’ O le Tala Lelei lea – ua oo mai le tausaga, ua oo mai le taimi. Atonu sa faaletonu le amataga, peitai e mafai ona suia ma faalelei loa auā o loo sisila mai fofoga agalelei o le Atua, ma ua finagalo malie i ai o Ia e faamalolo. E te le mafai ona fata se supa, a o loo sili ona e gagase.

# **NA O AFIOGA, E TULEI MAI FOFOGA..**

3. “E le’i iloa e i latou se ala e aumai ai ia te ia...ona o a’e lea o i latou i luga o le fale.” Lk 5:19.

E mamafa le avega pe afai e te tau’ave toatasi se isi tagata, faatasi ma lona moega. Silasila foi: (i) Na manaomia tagata e toafā latou te fataina le supa ia Iesu. E i ai nisi taimi e te valaau ai i isi e fesoasoani mai i lau galuega ma lau avega o tauamo. Pe afai sa e tatalo ma anapogi mo nisi ae aunoa se tali lelei e maua, o loo faapea mai le Afioga a le Atua, “*Afai e loto gatasi se toalua o outou...e faia lea mo i laua e lo’u Tama o i le lagi. Auā o le mea ua faapotopoto ai se toalua, po o se toatolu i lo’u igoa, ou te i ai faatasi ma i latou.*” Mata.18:19-20. (ii) O le faatuatua o le toafā, ae lē o le faatuatua o le tagata ma’i, na tali i ai Iesu. “*Ua silafia e ia lo latou faatuatua...*” Lk.5:20. Talofa i le tagata ua loa aso o faataotolia i le fala efu, ma o le umi foi lea o tāulia le fala o lona faatuatua. Peitai e lē se faafitauli lea i le Alii; e tali mai o Ia i lou faatuatua ina ua pa’i atu o Ia i lē ua alofa ia te oe.

(iii) E le’i faavaivai pe fai mea tuulafoai i latou. E te mana’omia le faatuatua e lē foi, e lē solomuli gofie ma faavaivai gofie i le tauamoina o tagata ia Iesu. E lē avea lou talanoa muamua i nisi e uiga i tofi ae le’i tali mai, e faapea ai o le a lē tali mai lava. Atonu e le’i saunia i latou i le taimi muamua, a o lenei ua lava tapena. Atonu foi e sesē le auala sa e fesoota’i atu ai muamua, ae o lenei ua sui au metotia. O le aano o le mataupu, a faatino lau pitolaau, o le a fai foi le vaega a le Atua. “*Aua nei tatou faapalapala i le amio lelei; auā o ona po e tatau ai tatou te selesele mai ai, pe afai tatou te lē faavaivai.*” Kala.6:9.

(iv) E le’i avea le faafelavei o le au faresao ma tusiupu, e le’i avea foi le tumu o le motu o tagata, e faalavelaveina ai pe faaluafesasi pe tolopō ai le faamoemoe autū na oo mai ai le toafā. Pe afai e tafatasi le alofa ia ola le ma’i, ‘aua le amana’ia le pola motu i tua, ‘aua foi le faasi’umata mo se taui, ona lē pine lea le i’u manuia o le sailiga fofō; e ola le ma’i, ma faatele ai viiga o le Fomai.

4. “A o outou, o le tino o Keriso outou, ma itu tino taitoatasi.” I Kori.12:27.

E lē mafai e se toatasi o tatou ona fai na o ia, mea e faigofie ona tatou faia faatasi, i le aumaia o tagata ia Iesu. O la le aposetolo, ‘O outou uma o le tino o Keriso (le Ekalesia), ma ona itutino taitasi’. Ae ua maitauina le faalogogatā ma le ulavavale o itutino i le tele o taimi. O le mafaufau e fete’ena’i ma le fatu (o le au fai faailoga ma tusi pasi, e fete’ena’i ma le au faatuatua). O lima e faitio i tulivae (o tagata e gaioi ma faatino galuega e faitio i e na o le tatalo). O mata e mumusu e galulue faatasi ma vae (o le au fai tofa mamao e mumusu e galulue faatasi ma le au tautua). O le alaleao le tusi mai o le aposetolo, “*E lē mafai foi i le mata ona fai ane i le lima, e leai sou aogā ia te au; e lē mafai foi i le ulu ona fai ifo i vae, Lua te lē aogā ia te au.*” I Kori.12:21.

E mana’omia e le Ekalesia Aoao ana Ekalesia taitasi e oo i nai Aulotu laiti; e mana’omia e Aulotu ana Matafale; e manaomia e le faifeau ana a’o’ao, tiakono, tina ma fanau. O le galulue pulupululima faatasi e lē gata o se auala lelei, ae o le auala o faatonu mai e Afioga a le Atua. “*Ia taumafaia e outou ona taofi o le loto gatasi i la le Agaga i le noataga o le filemu.*” Efe.4:3. Pe afai tatou te nonofo fealofani ma galulue faatasi, fai mai le Tusi Paia e ‘*poloai le Alii ia oo i ai lana faamanuia*’ Sala.133. E le’i valaaufina i tatou e faatusatusa, e faatauvā, e faameo pe faitio le tasi i le isi. E leai, ae na valaaufina ina ia faalava ma fa’atoa e le tasi o le isi. O la le Failauga, “*E sili ona lelei o le toalua i le toatasi; auā ua ia te i laua le taui lelei i la la galuega. Auā a pa’ū le tasi e faatuina o ia i luga e lē la te toalua...o le maea foi e sātuuatolu e lē vave motusia.*” Fai.4:9-12. E lē tutusa malosi, e eseese foi meaalofa, ae aogā le fetufaa’i e saga fa’ama’ai ai pea auupega ua foa’iina mai e le Atua, “*E maamaai le uamea i le uamea, e faapea foi ona faamafanafana o le tagata i lana uo.*” Faata.27:17.

## **FAAPA'IA GALUEGA EFKS NUUFOU**

*(mai itulau 3)*

galuega, ma saga faateleina ai le viiga o le Atua. Na faaleo foi le faamalo i le Matua o Faiva ma le Falefa o le Aiga Salemalama. Ua atoa tino o Vaatausili, ona o le alofa ma le fesoasoani o le Atua e faataunuu miti a le tagata faatuatua fia fai mea lelei mo Ia. Na saunoa faaopoopo le afioga Taitafono Fono Tele fai ma sui o le Ekalesia Aoao e faafetaia le soifua tautua ma fai mea sili mo le EFKS ae maise o le Atua. Na faaloto tele foi e tusa o la le aposetolo, “*O lenei o'u uso pele e, ia outou tumau ma le le faagaeetia, ia alualu lo outou faamalosi i le galuega a le Alii ma le le aunoa, ina ua outou iloa e le se mea faaleaoga lo outou tautiga i le Alii.*” Ona tauaaon lea e le Taitafono le meaalofa a le Ekalesia Aoao e \$10,000 mo galuega fou faapenei. Malo faafetai. O le Teutupe a le Aulotu le afioga Peseta Arasi Tiotio na saunoa i le tala otooto o le galuega. E \$100,000 le tupe faavae na maua mai le ta'i \$20,000 na saili e itutino e lima o le Ekalesia (Matafale, Mafutaga Tina, Aufaipese, Autalavou, Aoga Aso Sa). Na saili foi le nogatupe \$200,000 mai le BSP e faamalumalu ai le Ekalesia Aoao, ma le Toomaga. O le tau o le maota e \$298,000 faaopoopo i ai nisi tau o le faaleleia o le fanua, ae maise le toe teuteuga o le konekarate (variation) e soso'o ai le Maota o le Faafeagaiga ma le Malumalu, e maua ai le tau atoa o le galuega e \$360,000. Ae tele foi nisi vaega o le galuega na fai fua e le Faifeau faapea nisi o le Ekalesia na ofo atu la latou fesoasoani. O le konekarate o le New Era Construction sa nafa ma le galuega (na igoa muamua o le Yuhua na fai a foi le malumalu).

O le talaaga o le EFKS Nuufou na faavae i le aso 4 Novema 2012, ina ua tatala aloaia e le susuga Faauuga Matautia FT ma amata ai i le tulaga Faamisionare, na tofia i ai ma tausia e le susuga lava ia Letaulau ma Tina. Sa fai tapuaiga i le maota sa nofo ai ma le faifeau. O le tausaga 2013 na osi ai la latou feagaiga, ma fausia ai le maota o le galuega ma fai ai lotu. A o le tausaga 2017 na faapaia ai le Malumalu fou e tapuai ai. Ua atoa nei le 8 tausaga o le Ekalesia, ua 30+ ona Matafale galulue, faatasi ai ma nisi aiga fesoasoani pe tusa ma le to'a sefulu. Na faii'u lea aso mamalu i le taumafataga matagofie ma fa'aaloalogia maualuluga masani mo le afioga Taitafono Fono Tele ma le susuga Toeaina o le Pulega, na saunia e le susuga Faafeagaiga, Faifeau Nofoaiga & Komiti, A'oa'o Fesoasoani & Tiakono, Mafutaga Tina & Mamalu o le Ekalesia i ona tulaga faalupe. Malo faafetai le faaee i le Atua, faafetai le fa'aaloalo, faatamalii ma le faatupu. Ia faamanuia le Atua ma na Ia faatutumu

avanoa ua gaogao ona o Lona suafa ma Lana galuega.

“Aua le mapu i le faane'ene'e. Aleluia.”

*Faatonu Sulu*

## **O AU AFIOGA O LE SULU**

### **IA FAAMALOSI E FAAMALOSI**

*“O le mea lea ina faamalosi ai ia i lima ua gagase ma tulivae ua vaivai.” Epe.12:12.*

O le faamalosi'au atu e tutupu ai vavega i tagata. E i ai le ata tifaga e igoa o le ‘Stand Up And Deliver’ e faavae i le tala moni; e autū i le faiaoga o le mataupu Matematika e igoa ia Jamie Escalante i le A'oga Maualuga o tamaiti Sepania i totonu o Los Angeles Amerika. E lauiloa lenei faia'oga i ana auala ma metotia e faamalosi ai i tamaiti ina ia lelei le a'oa'oina ma popoto i mataupu. I totonu o le vasega e i ai ni tamaiti se to'alua e igoa uma ia Johnny. O le tasi Johnny o se tama lelei tele e fiafia ma toaga e fai ana meaa'oga. O le isi e sili ona ulavale ma faalogogata e lē lelei le faiga o ana mataupu. Ina ua fai le Aso o Matua i le tasi tausaga, na sau ai se tasi o tina ma fesili ia Jamie, po o faapefea mai lana tama o Johnny? Sa manatu le alii faia'oga o Jamie, o le tina lea o Johnny lelei ona ia tali atu lea, ‘O Johnny o se tama e sili ona lelei, ou te faafetai ua maua se tama faapea i la'u vasega, ou te fiafia tele ma alofa ia te ia.’ O le aso na sosoo ai, na alu ai Johnny leaga i le faiaoga ma fai atu, ‘Na ta'u mai e lo'u tina ia te au anapō la oulu talanoaga e uiga ia te a'u. Ou te lei faalogo lava pe iloa foi se isi faia'oga e manao ia te a'u i lana vasega.’ O le a le iuga o lenei sasi a Jamie? Na uma ona fai meaa'oga a Johnny i lena aso; e usu mai foi i le isi taeao ua mae'a ana meaa'oga na fai i le fale. O ni vaiaso mulimuli ane ua avea Johnny ma se tasi o tama sili ona lelei i le vasega, ma se uō mamae ia Jamie. Ua liliu atoa lona olaga, mafua mai se upu faamalosi'au na fai. O suiga ma vavega e tutupu faapenei: Pe afai e te fia silasila i le lelei o loo i se tagata ma e faaleoina atu i ai, ua e tuu atu i ai se faamanuiaga e tauivi ma tausinio i ai. Poo nisi faaupuga, ua e faamaite ma tuu atu i ai le avanoa e avea ai o ia ma tagata e sili atu nai lea o loo i ai. Ua e fesoasoani, faamalosi ma faamalolo i lima ua gagase ma tulivae ua vaivai. O le mea mulimuli na ta'u e le Atua ia Mose na te faia, “*A ia e poloai atu ia Iosua, ma e faamafanafana, ma faamalosi ia te ia, auā*

---

## O AU AFIOGA O LE SULU I O'U VAE

*o ia e alu atu lava i luma o le nuu nei, o ia na te tofia mo i latou le nuu e te vaaiā.” Teute.3:28.* O le mea e manaia ai, e lē seiloga e te mauoa pe tulaga taualoa, pe seiloga e poto ma aulelei, ona faatoā mafai lea ona e faamalosi’au; ae talia foi ma le fiafia e i latou e tuuina atu i ai. E fai lou sao i se vavega a taeao, pe afai e te faamalosi’au se tasi i le asō.

.....

### O TIOTERIFI LE MUAMAI.

*“Na ou tusi atu i le eklesia, a o Tioterifi, o lē fia sili ia te i latou, e lē talia i matou e ia.”*  
3 Ioa:9.

E i ai le muagagana e masani ai A’oa’o i Malua faapea foi le tele o nisi sosaiete - ‘E faalogo Mulimai ia Muamai’. O Muamai e faasino i le Vasega Faaiuaso (tausaga 4) ma le Vasega Lagolago (tausaga 3) na muamua ulufale ma auai; o Mulimai e faasino i le tausaga 2 ae maise le tausaga muamua – i latou na mulimuli atu. O le aano o lenei upu ina ia galulue faatasi ma felagolagoma’i Mulimai ma Muamai e tau fai manuia ai tagata uma ma le sosaiete atoa. O le tiute o Muamai e faatonu, faasino ma faata’ita’i tulafono ma aganuu e ola ai i totolu o le sosaiete, ma e sili ona manino le faasinoga a Muamai pe afai e taulāmua ona faatino nai lo le faamatala, pei o le isi muagagana ‘ia savali i upu’ (walk the talk). I le isi itu, o Mulimai e faalogo lelei, e maitau, taofi mau ma usitai i nei tu ma aga ina ia atamai ma aaooina ai. E sau aso tulai mai foi Mulimai e avea ma Muamai, ma tuufaasolo ai lea faiga lelei i soo se auga vasega ma soo se auga tupulaga.

Peitai e i ai nisi Muamai e lē saogalemū, e faigofie ona lamatia le tulaga, latou te taotaomia ma taofia ai soo se Mulimai e tau faalālā atu sona manatu e tautavā i lona tulaga sili – o ia na mua i malae. O le amio ma le faiga lena a Tioterifi, se tasi o tamā o le Uluai Eklesia i le Feagaiga Fou. Na maua Tioterifi i se tulaga faapopoleina ina ua logo atu e le Toeaina o Ioane, lona faamoemoe ma nisi A’oa’o o le Tala Lelei e fia oo atu e folafola ma faasoal le tala ia Jesu Keriso. Na ulufia Tioterifi i le fefe ina ua manatu ifo e avea le asiasiga ma le oo atu o lenei malaga e lamatia, faaitiitia pe faoa ai lona tulaga faa-Muamai i totolu o le Eklesia. O le ala lea na ia te’ena ai ma

vaoia le oo atu o lea sāvali faamisiona. Sa tiga tele le Toeaina o Ioane i lenei amio a Tioterifi, ona ia tusi lea ia Kaio e faailoa i ai le fuafuaga o le a faia e tusa o le faafitauli ua tulai mai.

*“Na ou tusi atu i le eklesia, a o Tioterifi, o lē ua fia sili ia te i latou, e lē talia i matou e ia. O le mea lea, pe a a'u alu atu, ou te faamanatu ai lana amio o loo faia e ia, o loo tuaupua mai ia i matou i upu leaga; e le gata foi i ia mea, a e le talia lava e ia le au uso, e vavao atu foi i e loto i ai, na te faate'aina foi i latou i le eklesia. Le au pele e, ‘aua e te faaa'oa'o i le leaga, na o le lelei.”* 3 Ioa:9-10.

E faanoanoa ae o le upu moni o loo malosi le amio faa-Tioterifi pe faa-Muamai i totolu o nisi sosaiete ma faalapotopotoga. E maua ai matai ma suli o nisi aiga na muamua faapaleina i suafa; e maua ai i latou ua leva ona umia tofi i totolu o faiganuu ma faigamalo, e maua ai tagata faigaluega na muamua galulue i ofisa, kamupani ma faalapotopotoga. Ua oo lava i totolu o Eklesia ma Aulotu o loo malosi ai lenei faiga. O nisi Matafale, Tiakono, Aoao Fesoasoani ua oo lava i Tina, Faletua ma Tausi, e tausisi lo latou matutua i le tofi ma le leva i le galuega. E faumalo i tonu ma fuafuaga fai a Aulotu, e ui ina leo tele upu nai lo faatinoga. O nisi ua manatu latou te pulea le galuega i le itu i fafo; a o le faifeau e nafa ma le Tusi Paia, pulelāa ma le itu faaleagaga. Latou te aumai le tulaga o i ai le pulega o latou au aiga, o faalenuu ma faiga-malo, e faatonutonu ai le galuega a le Eklesia. Latou te faatupu auala taufaamata’u i le au Mulimai, e faavaivaia ai lo latou lata atu i le pule ma le paoa. Latou te tuua’i fua alii ma tamaitai e alualu lo latou soifua tautua, i auala amioletonu e ese mai o latou agavaa ma failogia. Latou te saili masei, ma taufaaleaga ina ia molia ai.

Peitai e sesē o latou manatu, auā o le taumafai e faaitiitia le isi tagata, e lē faapea o le a siitia ai fua i luga o latou laasaga. O le upu ‘tevolo’ e tupuga mai le upu ‘tiapolo’ (*diabolos*) o lona uiga o le *taufaaleaga*. Afai la o loo e taufaaleaga, lona uiga o lena e te faia le galuega a le tiapolo. Afai foi o loo foliga ia Tioterifi lau amio e tausisi lou tulaga faa-Muamai, e faavaivaia ma faatausuai ai isi uso a Kerisiano, o lona uiga o loo e naunau ia malepe pe vaevaeina le sosaiete o loo e i ai. E mamafa fetalaiga a lo tatou Alii, o Ia foi le Ao o Lana Eklesia, faasino i tagata e faatausuai i isi uso laiti, uso fou ma lē taualoa i totolu o le faapotopotoga, “Ai se na te faatausuaiina se tasi o i latou nei e faatauvaa...”

## O AU AFIOGA O LE SULU

### PE A VALA'AU LE ATUA (1)

*"Ia alualu lo outou faamalosi i le galuega a le Alii ma le lē aunoa." 1 Kori.15:16.*

E ese le matāfaioi/matātā/galuega (career), ese le valaau (calling). O le matafaioi po o le galuega o se mea e te filifilia; o le valaau o se mea e tuuina mai ia te oe. O le galuega o se mea e te faia mo oe; o le valaau o se mea e te faia mo le Atua. O le galuega e folafolaina mai tulaga, tamaoaiga ma le pule; o le valaau e masani ona ofoina mai faafitauli, faigata, sauaga ma fa'aaogaina ai e le Atua. O le galuega e i'u ina ua litaea ma maua faamanuiaga; o le valaau e le i'u vaganā ua uma le soifua. O le galuega e mafai ona faamuta e nisi faalavelave; ae mafai e le Atua ona faataunu lou valaauina i taimi ma siosiomaga e sili ona faigatā. Mo nisi tagata i le Tusi Paia, o le usitai i le valaau a le Atua o lona uiga e ola i le olaga o le pologa, e pu'e ma tu'uina atu e fa'aaunuua, e oo lava i le tuuina i le oti. O faamanuiaga o a latou galuega e le'i matuā tino mai, peitai na latou faatino lo latou valaauina i auala tulaga ese.

O le alii o Chuck Colson na ia umia se tofi maualuga tele i le malo o Amerika. Na ia umia le malosi ma le pule i le faigamalo a le Peresetene o Nixon, ae peitai na i'u i le fale puipui. Ua uma lana galuega, ae o lona valaauina faato'ā amata. Na valaauina o ia ina ia aapa atu i isi e pei o ia – o pagota ma e solitulafono. Na ia tusia le tele o tusitusiga; o lana molimau, 'O le talatu'u moni o lo'u olaga o lo'u toilalo aupito sili – sa molia a'u ma faamaonia lo'u soli tulafono. O lo'u faalumaina sili – le tu'uina o a'u i le toese – o le amataga lea o le fa'aaogaina aupito sili e le Atua o lo'u olaga; na Ia filifilia le tulaga sa le'i ta'ulelei ai a'u, ma fa'aaoga ina ia viia ai o Ia.' I le taitaiga a le Atua, o le faamutaina o lau galuega e avea ma amataga o lou valaauina. O le mea lea o le a lava le galuega ua valaauina oe e le Atua e fai, ua faapea mai lana afioga, "Ia outou tumau ma le lē faagaeetia...e lē se mea faaleaogā lo outou tautiga i le Alii."

### PE A VALA'AU LE ATUA (2)

*"Ua toe valaau le Alii ia Samuelu, o le foi faatolu lea." 1 Samu.3:8.*

E te le'i tu lauelelele mai i le lalolagi ma sou valaauina ua uma ona faamāioio lelei, ma ni ou faamanuiaga ua mae'a faama'ape lelei. O le silafia lelei o le valaau

a le Atua e masani ona aofia ai taumafaiga e manumalo a'ia'i pe toilalo popo. E faafā ona valaau le Atua ia Samuelu faato'a ia iloa lelei le siufogaga paia. Ae le'i savali Peteru i luga o le vai na ia fai atu, "Le Alii e, afai o oe, ia e fetalai mai ia te a'u, ou te alu atu ia te oe i luga o le vai." Ona fetalai atu lea o Iesu, "Ina sau ia." Mata.14:28. O se a'oa'oga taua mai iinei: E lē o oe, ae o Iesu e pulea le savali i luga o le vai! O le valaauina e lē faapea e te maua ai le malosi ma le pule e fa'aaogā i soo se taimi mo soo se faamoemoe e te mana'o ai. Ae e te le'i filifili e alu ese ma le va'a e lelei ona muamua e iloa o le mea lena na valaauina ai oe, ma o Iesu lena na valaau mai ia te oe. O loo saili le Atua i le tofa loloto ma le faautaga mamao e sili atu nai lo le sogasogā faaPeteru. E i ai taimi tatou te faia ai faai'uga faatamala ma afaina ai i tatou ma isi e pele, pei o faiga-paaga, mataupu tau tupe ma aitalafu, tulaga o galuega; ona taumafai lea e toe teuteu lelei ma valivali i faaupuga faaleagaga. E tāua le tuu o lou ola i mea e lamatia ai (le oso i lalo mai le vaa, ma le savali i luga o le vai) ae mo se tagata Kerisiano o ia mea e tatau ona fesootai ma le tali tu'u sa'o i le Atua. O le 'iva e lamatia ai oe i faaosoosoga e fofō ou faafitauli i le faia o faai'uga faanatinati e lē o gatasi ma le finagalo o le Atua. E itiiti lava le eseesege o le 'lē fefe' ma le 'lē faautauta', ma e tele ina nenefu ai le toatele. O le silafia o le taimi tonu e oso ese ai mai le vaa ma laa i mea matautia, e lē na o le toa e manaomia ai; ae sili ona manaomia le faautautaga atamai e fai ai fesili talafeagai, o le faalogologo toto'a e iloa gofie ai le siufogaga o le Matai, ma le onosai e faatalitali ai pea seia fetalai mai o Ia, 'Ina sau ia.'

### PE A VALA'AU LE ATUA (3)

*"E matalasi foi mea mamana, a e tasi lava le Atua, o le na te matuā galue i mea uma i tagata uma lava" 1 Kori.12:6.*

O isi faaliliuga o le mau a le aposetolo o ta'ua i luga e faapea, 'E galue le Atua e ala i tagata eseese i auala eseese; pe faapea foi, e eseese auala e galue ai le Atua i tagata taitoatas'i.' O tagata fai ipu omea atamamai latou te silafia lelei, afai e lolomi atu le omea e toe oomi mai; e ta'u mai ai le ituaiga ipu e mafai ona fai ai, ma le ituaiga foi e lē fetau i ai. O isi fai ipu omea tau faata'ita'i latou te lē iloa lelei lea tulaga, ma e iloa gofie le eseesege i le i'uga o oloa e gaosi.

## **O AU AFIOGA O LE SULU**

Afai e te lē fa'aaloalogia au puna'oa totino (raw material), e ono avea i latou mou fili. O le upu o loo faaliliu mai ai le upu 'valaaufina' (vocation), e tupuga mai le upu Latina o lona uiga o le 'leo'. O le iloa tino o lau galuega e manaomia ai le manino lelei o lau faalogo. Afai e te faataligatuli pe logonoa, ma tulituli se mea e le'i valaaufina ai oe po o se mea e te lē agavaa i ai, o le i'uga e te ola ma le popolega i musumusuga, 'O loo e taumafai e fai se mea e le'i valaaau mai ai le Atua ia te oe'. O le lototeli e tautino le gaogao ma le ausage na te aumaia le saolotoga tele; ae afai e leai, na o le avea ma pologa. Fai mai le tusitala lauiloa o Parker Parmer, 'E lē mafai ona e filifilia lou valaaufina; e tatau ona tuu i lou olaga e tautala mai.' (You cannot choose your calling; you must let your life speak). Atonu na foafoaina oe e avea ma Faia'oga ina ia a'oa'o atu, ma ua faatamaoaigaina ai nisi tagata. Afai o lea, o le a e tosina e faitau tusi, e su'esu'e ma saili, e tusitusi ma a'oa'o. Peitai afai e te soona saili solo i soo se ala manuia, ina ia lauiloa ma tauleleia ai lou olaga, o le a pei oe o le tagata e 'a'au agai i le tafe mai o le āu. E sili ai le fa'aa'oa'o e ti'eti'e ma alu faasaga i le itu o aga'i i ai lau manu. Atonu e lē silafia i tatou uma e le toatele o le lalolagi, i sa tatou maa ua togi poo se 'aso ua lafo i le galuega fai faatasi mo le manuia o le lalolagi ae maise mo le galuega a le Atua, peitai e mautinoa lava e leai sina auauna e misi i le faitau a le Alii pe a i'u lana galuega ma Ia faafeiloai mai, "Ua lelei ia, le auauna lelei e, ma le faamaoni, ua e faamaoni i nai mea iti, ou te tofia oe e pule i mea e tele; ina ulufale mai ia i le fiafia o lou alii." Mata.25:21.

## **O TA'ITA'I E FAUSIA**

"O ai ea a'u nei, ou te alu atu ai...?" Eso.3:11

Aiseā e valaaau ai le Atua i tagata e manatu ifo e lē talafeagai pe agavaa? O le tali, ina ia latou faalagolago ia te Ia e sili atu nai lo le faamoemoe ia te i latou lava. Ina ua valaaau le Atua ia Mose o lana fesili, "O ai ea a'u nei, ou te alu atu ai ia Farao..?" Ina ua

## **AUE! UA MALILIU TOA.**

Apelu Lelevaga FTP (19/9/41-19/4/20)

Fu'aolemalu Johnson Lelevaga (1/8/48-29/6/2018)

O le susuga i le Toeaina Penisione ia Apelu Lelevaga ma le Faletua ia Fu'aolemalu, sa avea ma Faafeagaiga a le EFKS Tuanai i le Matagaluega Malua, mai le tausaga 1976 seiā oo ina Penisione i le tausaga 2012, ua atoa ai le 36 tausaga o le soifua galulue i le galuega faafaifeau a le EFKS. O se tala ototo o lo la'ua soifua tautua i le galuega a le Atua:

1972 - 1975:	Kolisi Faafaifeau Malua
1976 - 2012:	Faafeagaiga EFKS Tuanai
1990 - 2012:	Toeaina Pulega Malua Sasa'e
2004 - 2012:	KMTA Matagaluega Malua
1995 - 2004:	Failautusi Komiti Au Toeaina
2007 - 2011:	Peresetene SMT
1995 - 2012:	Komiti Malua (MTC)

Sa fai ma Sui o le Matagaluega Malua i Komiti Au Taumafai, Komiti Faamisionare, Komiti Feau Eseese. O Taulaga Soifua ma Lupe Faalele mai Iva, Saanapu, Fogapoa, Salua Manono.

Na maliu le Faletua ia Fuaoolemalu i le aso 29 Iuni 2018, a o le susuga i le Toeaina i le aso 19 Aperila 2020. "Amuia lea auauna, pe a sau lona Alii e maua o ia o loo faapea ona fai." (Saunia mo le Sulu: Tafatolu Lelevaga FS)

## **O TA'ITA'I E FAUSIA**

valaaufina Kitiona o lana tali, "E! Le Alii e...faauta mai, ua topito ona faatauvaa lo'u aiga i Manase" Faama.6:15. Ina ua valaaau le Atua ia Solomona na ia tali, "Le Alii e lou Atua, o au o le tama itiiti, ou te lē iloa ona ulufafo ma ulufale." 1 Tupu 3:7. Ina ua valaaufina Ieremia o lana tali, "Auē, le Alii e le Atua, faauta, ou te lē iloa ona tautala, auā o au o le tama itiiti." Iere.1:6. Peitai o i latou uma nei na avea ma nisi o ta'ita'i iloga o le nuu o le Atua. Na faapefea ona latou mafaia? Ina ua latou fai atu Ioe, ua lelei i le valaaau a le Atua; na aoaoina i latou mai o latou sesē ma faalētonu, ma saga faatupulaia ai lo latou atamai; ma latou toina mai le malosi mai le Atua i aso taitasi. O lona uiga poo le a lava le telē pe itiiti o lou tofiga i le olaga nei mai le Atua, e mafai

(silasila itulau 11)

# FETU'UTU'UNA'I MUNIAO

Mareko 8:36 “Auā se a le aogā i le tagata, pe afai na te maua le lalolagi uma, ae maumau ai lona ola?”

Tasi lenei fesili tuu sa’o a le Alii, o loo aumai ai se lu’i ttau mo tagata. O le fesili o loo atagia ai, e lua ituaiga ola o loo i le tagata soifua. O le ola o loo e soifua ai i le tino, lea o loo tatou tafili saunoa ai i lenei olaga. Peitai o le ola lena ua pisia i le lalolagi ma ona tuinanau, ma ua toilalo i le fili ma ana mailei (agasala). O le isi ola, o lou soifua ma lo’u ola faaleagaga. Ma o le ola lea e mafai ona e soifua ai i tala atu o le tuugamau, i le manuia e faavavau, pe afai e te salamō fa’amaoni. Ma o le ola la lea o lo’o ta’ua nei i le saunoaga a le Ali’i.

Ma o lou soifua ma lou ola fa’aleagaga, o le ola lea o loo sili ona manumanu ma tāua i le Alii, nei meaane ua fano. Leaga o le ola lea na Ia afio mai ai, e avatu i le tagata, e ala i Lona maliu & toe tu manumalo. O le mea ia manatua, o le ola muamua (tino), o le ola lea e oti uma ma toe foi ai le tagata i le eleele, pei o le ala o le lalolagi. Peitai o le ola faaleagaga, e i ai i latou e fano ma faaumatia (tagata e lē salamo), ae e i ai foi i latou e faaolaina ma lavea’iina i le Alofa Tunoa, i le Ola Fa’avavau. O le uiga lea ole upu a le agelu i le Ekalesia i Semurana, “O lē manumalō, e lē afaina lava o ia i le oti faalua” (oti le tino, toe fano le agaga).

O le uiga lena o le fesili a le Alii i lona au soo ma le motu o tagata, “Se a le aogā i le tagata, pe afai na te maua le lalolagi uma a e maumau lona ola?” Se a le aogā i le tagata e saofa’i i le mamalu ma saoloto i le tamaoaiga, maua le poto ma mea uma, ae mativa i le Alofa ma inoino i le Amiontonu. E leai se aogā e momosi ai ma lalelei o tatou tino, e lē aogā lo tatou manumanu i le malosi ma lo tatou ola i ona fiafiaga ma tuinanau o le lalolagi, ae fano ai o tatou ola faaleagaga e faavavau.

Manatua o le fesili lea a le Alii na fai, ina ua atagia ia Peteru ma le au soo se uiga faa’afa’afa ma le faalotolotolu, i le ofoina o lo latou ola mo Ia ma le tala lelei. Fai mai le tala, o lea ua amata ona a’oa’o atu le Alii, i le uiga o le taunuuga o la latou mafutaga ae maise o Lana Galuega Faaola. Lea ua sauni e savalia le ala o puapuagā, ma agai atu i le Satauro, ae taualuga i Lona Maliu ma Lona Toe Tu manumalo.

O le molimau a Mareko, o Peteru lava na fai ma sui o le au soo, e vavao i le Alii, ia aua ne’i alu i Ierusalem, aua ne’i taunu nei puapuaga, auā ua mautinoa e Peteru ma le au soo, afai e puapuagatia ma fasiotia le Alii i Ierusalem, o lo latou tuugamau foi lea.

Fesili: Aisea ua faapea ai le au soo filifilia a le Alii, ua faalogo i aoaoga, ma va’ava’ai i vavega i ‘A’ao o le Alii, ae lē au fa’atuatua lava? Ioe, o le natula lea o le tagata, e mafuli i le vaivai, e faigofie ona taomia e le fefe ma le masalosalo le fa’atuatua i le Atua. Leaga o le upu moni, e i ai Kerisiano faapea, e fia fai Keriso, ae lē fia amo satauro, e fia manumalo, ae lē fia tigaina, e fia auauna ae manumanu i le ola ne’i lamatia, e fia pule, ae lē fia tautua. O le upu moni, o le mafuaaga lea o Kerisiano faa’afa’afa ua i ai nei, ua fetāa’i solo faaloulēmagā, e tau su’e se Fa’aoletaga e faigofie ma taugofie, se Eklesia e maua ai.

E manatua le tala i se ulugalii, na o e su’e se Aulotu faapea e lolotu ai, se Aulotu e leai ni mea e faia ai, ua lē lavavā tautua. O le sailiga lenei na oo lava i Niu Sila, ona o loa lea i le Patele ma fesili i ai, fai mai le tali a le Patele. “Ioe tele ia o Aulotu faapena i Niu Sila nei, tuu loa i ai e le Patele le tuatusi o le Aulotu lea. Ua o fiafia si ulugalii, ae taunu atu e leai se Aulotu ma se Falesa, a o le Fanua tanu i Magele. Toe vili loa i le Patele masalo ai ua sesē, ae fai mai le Patele, pau a na o le Aulotu e leai ni mea e faia ai, na o tagata ua maliliu, e na o le ta’o’oto ma faasasaga i lugā.

Ioe, o le uiga lena o le faamanatu a le Alii ia Peteru ma le au soo ma i tatou foi, i e manumanu i le ola o le mea e pala, ma asosi i mea faafoliga o le olaga o mea e mou atu, ae maumau ai le agaga e fa’avavau. Fai mai le Ali’i, “Auā ai se fia faasaogalemuina lona ola, e maumau ai ia te ia; a o lē faamaumau lona ola ona o a’u ma le tala lelei, e faasaoina e ia.” O le a le uiga? E lē afaina i le oti faalua. Afai o le finagalo lea o le Alii, ia faamaumau o tatou ola mo Ia ma Lana Tala lelei, e faapelepele la o le a o tatou ola? E manumanu la o le a i le malosi ma taleni ae le ofo i le Alii na te faaogaina ma faatele mai?

O lea ua toe faamanatu mai e le Alii, o le ola lea tatou te tafili saunoa ai, e na o ni nai tausaga faatauvaa lava e te momosi ma aulelei ai, ma masausau ai lou

malosi i tu'inanau ma mea faafoliga, ae lē faavavau. "Ua e faia o'u aso e pei o le lautele o le alofilima." Sala.39:5. O le ata o le pu'upu'u ma le sa'asa'a o aso o le tagata i luga o le fogaelele. O le puao i le taeao, ae mavae i le afiafi. O le uiga lena o le fesili a le Ali'i, Se a le aogā e faase'e ma faamalie ai i tatou e Satani i mea faatauvaa o le olaga, ae fano ai o tatou agaga e fa'avavau?

Ioe le au uso e, o la tatou malaga e nofo ae 'olo e lē tumau, o iinei ua na o se nofoaga e tapena ai mo lo tatou nuu tumau ua uma ona saunia e Keriso, i tala atu o le tuugamau, tatou te faasoaina ai faatasi ma Ia le olioli o Lona manuia e faavavau. O le a la le isi mea, o le a le ola e sili ona taua ia te oe, o le tino e pala, po o le Agaga e fa'avavau? Pule a oe.

*Keneti Leaupepetele (F.S.)  
EFKS Savaia & Tafagamanu-Uta*

### **TAOFIOFI LOU ITA (Tu'ifao lou ita)**

O lenei tala e uiga i se tamaititi e inainā ma matuā malosi lona loto ita. Sa taumafai lona tamā i se auala e fesoasoani ai i lona atalii. O le tasi aso na ia tago ai i le taga fao ma fai i ai, soo se taimi e te ita ai tago e tutu'i se fao i le pa. Ona faia lea e le tamaititi-so'o se taimi e ita ai, ua tago tutu'i le fao i le pa. O le aso muamua e 40 fao ua tutu'i le pa. Ina ua uma le lua vайасо ua amata ona pulea e le tamaititi lona ita ma faaititia fao e tutu'i le pa. Ona fai lea i lona tamā, ua faaititia lo'u ita so'o, ma ua ou tau le ita foi seia o'o lava ina fai atu le tamaititi i lona tama ma le fiafia, ua le toe ita. Ona fai atu lea o le tamā i lona atalii e alu e se'i ese uma fao na tutu'i le pa, ia tasi le fao i le aso. Mavae nai vайасо fiafia le tamaititi ma fai i lona tamā ua uma ona se'i ese fao mai le pa. Ona fai atu lea o lona tamā i ai ua lelei ua e a'oa'oina le pulea o lou loto ita. Ua tumu a'u i le fiafia i le tulaga ua e i ai. Ae vaai oe i le pa ua le toe tutusa le tulaga ua i ai ua tumu i pūpū ma ma'ila'ila i fao na e tutu'i i ai. E lē afaina po o le a le tele o taimi e te fai mai ai, faamagalo ma faatoese ai (Im sorry). Ae peitai ua iloga le tulaga o le fao. E faapena lelei le afaina o loto o tagata i upu e te fai i ai pe a e ita, i upu mamafa ma lē faaaloalo. Pe e te faatoese mulimuli ane ae ua lē tutusa lava ua i ai pea ma'ila

ma faailoga o upu mamafa na e faia i o latou loto. E sili atu ona tiga ma afaina lagona o le loto i upu mamafa ma le lē mafaufau e lafo e se isi ona o le ita. E faigofie lava ona toe faatoese ma faamaulalo i le sesē na fai, ae sili ona fiafia o tatou matua ma aiga pe a pulea o tatou lagona ita, ma to'amalie faai'uga e te fai e lē afaina ai se isi. Ae tupu le ola fiafia ma le mafuta faatasi o oe ma aiga ma uo. O oe o le toa i taimi uma pe a e pulea lou ita, o lou inoino ma lou manatu faapito ae talia ma le loto faamaulalo galuega alofa a le Agaga o Iesu Keriso e musuia ai oe i taimi uma. Ua na o Ia e magalo ai o tatou sesē ma faaletonu ma suia ai o tatou tagata leaga.

*Solomona Tuatagaloa, FTP*

### **O TA'ITA'I E FAUSIA**

*(mai Itulau 9)*

ona e tupu atili ma faateleina ai. E anoanoa'i foi tagata laulioa i le lalolagi i soo se matatā sa manatu i latou e tapulaa o latou agavaa. Ae sili ai ona toatele i latou sa latou faamasino ma faapea ane, e le taulia ma le agavaa. O le tamaitai pese laulioa ia Maria Matini na fautuaina e se tasi faiaoga faapitoa i le leo, e vaivai lona siufogaa ma e na te lē mafai ona oo i se tulaga lelei i le taleni o musika. Peitai na ausia e lenei tamaitai pese le tulaga maoa'e i musika ma faafiafiaga ona o lona filifilīgā ma tauivi e manumalo i ona vaivaiga. E faapena foi i le faipule failauga Eleni laulioa o Demosthenes. Sa i ai se faaletonu i lona fofoga na afaina ai lana tautala a o laititi o ia, na mā e tautala i luma o tagata. Sa ia toaga e nofonofo i autafa o le sami ma faata'ita'i lana tautala i le aso atoa, ma o le i'uga na avea o ia o se tasi o failauga ta'uta'ua o le lalolagi. Atonu e te manatu e leai sou agavaa poo ni mafuaaga e avea ai oe ma taitai; ae tusa ma le faasinoga ma le ta'ita'iga a le Atua, e mafai ona e tulai mai o se ta'ita'i sili. Aisea? Auā e ui ina o oe o le efuefu ma 'uti'uti lou tagata, ae o le Atua o loo soifua i totonu ia te oe e leai sona tapulaa!

# OEUA FAI I LAGI LE FOLAUGA

## APE TAUPA'Ū FAOA STEHLIN 26/11/1944 – 24/12/2019

O le tina ia Ape Taupaū Faoa Stehlin na soifua mai i le Aso 26 Novema 1944 i lona aiga i Manono. Ae na fa'amanavaina ana galuega e lona Matai i le Aso 24 Tesema 2019, i lona aiga i Aleisa Sisifo. Sa faaipoipo atu Ape ia Patrick Stehlin o Aleisa ma ua faiilagi foi lana folauga. O Aleisa lava sa nonofo ai i laua i fanua o le au Stehlin ma faafalele ai le fanau ma le aiga. Sa lolotu i le EFKS i Aleisa Sisifo ma sa umia foi e Patrick Stehlin le tofi tiakono sa tautua ai i le Ekalesia.

E toasefulu ma le lua (12) le aofa'i o nai o la'ua alo, ae toa 34 le aofa'i o fanau, ma fanau a fanau. O Ape o se toe Iutaia lea o le Ekalesia i Aleisa Sisifo na totoe, ina ua faiilagi le folauga a nai tamā ma tinā matutua o le Ekalesia sa i ai. O Ape e le'i fa'ata'otolia i se gasegase ae o lona ma'i oso na ave ai i le falemai ae mulimuli ane i nai aso na soso'o ai ma maliu ai lava.

Sa faia toe sauniga o le tina ia Ape i le falesa EFKS i Aleisa nei i le Aso Tofi, 2 Ianuari 2020. Sa ou taitaia le sauniga, tatalo Falaniko Tamiano o le Tiakono Katoliko Ae lauga Feliuai Matautia o le AOG. O le Tamā penisione ia Elekosi Viliamu sa faaulufaleina le tino maliu o Ape, o ia foi sa faia le molimau o Ape ona ua leva le laua mafutaga ma Ape ao tausia e i laua ma le faletua ia Lila le galuega i Aleisa. Molimau Elekosi faapea o Ape o se tina e fai mea-malie tele.

O lona olaga atoa na o le fiafia lava. E le mafai ona misi Ape i mea fai a le Ekalesia. Sa auai foi faletua o faafeagaiga, e fai ma sui o le mafutaga a tina o le Pulega ma sa ou tuuina ai le avanoa i le Failautusi o le Mafutaga ia Tafao Misipalauni Faatau e molimau e tusa o le latou mafutaga ma Ape. Sa molimau Tafao i le telē o le sao o lenei tina i totonu o le mafutaga a le Pulega. O se tina e aga malie toe mata'ata'ata i taimi uma. E le mafai na misi Ape i mea fai a le Pulega, ma o ia foi o se tina matua na faamatuia i ai le mafutaga. O se tina e agamalu, loto alofa ma ona uiga e tumu i le tausaafia. Sa faapea foi le molimau a le fanau e tusa o le latou mafutaga ma le latou tina. O se tina e mafuta i le Atua toe alofa i le fanau.

Na mae'a lona toe sauniga ona molimoli ai lea o lona sa i lona oliolisaga tumau i lona aiga i Aleisa Sisifo. Sa ou taitaia le sauniga i le tuugamau ma matou faatofa atu ai i le pese faatofa a le au Kerisiano. O le tatalo ia saga faamaise le Agaga o le Atua i le aiga faavauvau ona o le valaau a le Atua i le tina, aemaise ua matuaoti le fanau ina ua fulitua uma mai matua. Ae peitai o Keriso lava ia na fatalai

*"Ou te le tuua outou o matuaoti, ou te sau ia te outou. E toe itiiti ona le vaai mai lea o le lalolagi ia te au, a e vaai mai pea outou ia te au; ou te ola a'u, o le mea lea e ola ai foi outou"* Ia manuia lau malaga Ape, ia maua sou nofoaga i le Lagi o loo tausinio i ai le au Kerisiano.

*Pati Crichton, FS  
EFKS Aleisa Sisifo,  
Matagaluega FALEATA*

## TAVEUVEUALO FATU TAGALOASA LOLE (TK) 16/12/1947 – 18/1/2020

O le afioga i le Tiakono ia Taveuveu Alo Fatu Tagaloasā Lole na soifua mai i le Aso 16 Tesema 1947, ae na fa'amanavaina ana galuega e lona Matai i le Aso 18 Ianuari 2020, i lona aiga i Brisbane, Ausetalia. O le alalafaga o le afioga i le tiakono e mai le nuu o Sataoa aua sa Tunumafono, Taoa ma Afemata. Le fetaluga ia Faleafulugogo ma ia o le Faletolu. O ona matua o Tagaloasa Lilomaiava Lole Tagaloasa ma Teuila Tagaloasā Lole. O Taveuveu Tagaloasa sa faaipoipo atu ia Lafaitele Pani Faatoafe Tagaloasa Lole. E toafitu nai o laua alo, ae toa 35 le aofai o fanau ma fanau a fanau, ma o loo aumau uma i atunu i fafo. O Taveuveu na malaga e si'ima'i i Ausetalia ia Tesema 2019 ma e le'i manuia lona si'iga gasegase aua na maliu ai lava i Ausetalia. O Taveuveu o se tama e malosi toe fiafia e galue i faatoaga aua o lona lava lea olaga atoa. E le'i i ai foi sona gasegase tumau ae peitai ai lava ua leva ona taafifili ma se gasegase e le'i iloaina.

E tusa ma faamaumauga a le Faifeau Penisione ia Elekosi Viliamu sa tausinuu i Aleisa ae ma te lei taunu atu, na taunu atu Taveuveu ma Lafaitele i Aleisa i le tausaga e 2007, ina ua maua lo laua fanua umia saoloto i totonu o Saleimoa-uta po o Aleisa i Sisifo ona latou galulue ai lea mai lena taimi seia oo mai i le taimi nei. O le filifliga a le Ekalesia i Aleisa i le tausaga lava lea na faailoa mai ai e le tamā ia Taveuveu le fia ofoina atu o lona soifua e tautua ai mo le

## **TAVEUVEU AFT LOLE**

tofi tiakono. O lea sa faamaonia ai loa lona tofi tiakono, ma faaeetia ai loa i le Potopotoga a le Pulega a Faleata i Sasae ma aloaia ai loa lona tofi tiakono, ma galue mai ai loa i lena taimi seia oo mai i le taimi nei. A fua i ai ua atoa le 13 tausaga o avea Taveuveu ma tiakono a le Ekalesia i Aleisa i Sisifo. O le Aso Toonai 18 Ianuari 2020, na logo mai ai le tala e le tina o le aiga ia Lafaitele Pani Tagaloasa ua tuumalo le tama ia Taveuveu Alo Tagaloasa, o lea na malaga ai loa le faifeau i Purisipeni i Ausetalia mo ona toe sauniga.

O le sauniga faale-aiga o le tiakono sa faia i le malumalu o le Katoliko Roma i totonus o Logan i Brisbane i le Aso Gafua 27 o Ianuari 2020. O le susuga i le toeaina o le Pulega a Purisipeni i Saute o Ionatana Faaiuaso sa taitaia lea sauniga ma saunia le upu faamafanafana, a o le susuga i le faafeagaiga ia Paratiso Afaaso o le Ekalesia i Logan Holme sa ia faaulufaleina mai lona sa i le malumalu. O a'u nei sa faia le tatalo. O le aso na sosoo ai Aso Lua 28 Ianuari sa faia ai lona toe sauniga i le malumalu lava o le Ekalesia Katoliko i Brisbane. Sa faaulufale mai lona tino maliu e le susuga i le toeaina ia Ionatana Faaiuaso. O le susuga ia Paratiso Afaaso sa saunia le upu faamafanafana ao au nei sa taitaia le sauniga ma saunia le molimau faaleagaga o le tiakono. E tusa o le molimau a le tina ia Lafaitele, o Taveuveu o se tagata su'e malo. O se tamā finau i le taumafaiga o le fanau ma le aiga. E tumu i le tausafia ona uiga, e agamalu toe fa'aaloalo, ae sili ai o se tama e tumu i le alofa. O le Tiakono ia Taveuveu o se tagata galue malosi ma o se Matafale malosi foi ma toe

faamoemoeina i mea fai i totonus o le Ekalesia. O upu faai'u o la'u molimau na ou manatua ai upu a Ioane i le Fa'aaliga 14:13. Ao fa'aunuua ai Ioane i le motu o Patamo na ia iloa ai le fa'aaliga o le manuia o i latou, o e sa tautiga mo le Alii. O le toatele o i latou ia sa i ai i le puapuaga tele, sa sauaina ona o le latou molimau i le Keriso toetu. Fai mai Ioane "*Na ou faalogo foi i le leo mai le lagi ua faapea mai ia te au, ia e tusi amuia e ua oti, o e ua oti oi le Alii, e amata i nei ona po o lea lava ua fetalai mai ai le Agaga, ina ia latou malolo ia latou galuega tiga, aua foi o a latou galuega e mulimuli ia te i latou.*" O la'eia ia o Taveuveu, o mea sa tautiga ai, fafailele lona aiga, faasino le fanau i le Atua, lea ua faifeau isi o le fanau. Ae maise o lana tautua i le tofi tiakono o le galuega paia a le Atua i totonus o Aleisa. O ana galuega lelei ia ua mulimuli mai ia te ia. Aua e ui ua fulitua mai ae o le mea ua mautinoa ua lafoia le aiga ma le fanau i ata o lana faatofalaiga. Lea la ua mana'o le agelu ia Ioane, o ē uma ua tautiga mo le Alii, faamau i lalo o latou suafa, ua i ai o latou igoa i le tusi o le ola. Na uma le sauniga ona molimoli ai lea o lona sa i lona oliolisaga tumau i se tasi o fanua tanu i totonus lava o le aai o Logan i Brisbane. Sa ou taitaia le sauniga i le tuugamau ma matou fa'atofa atu ai i le pese faatofa a le au Kerisiano. Faafetai tele Taveuveu. E faapea atu lau Ekalesia i Aleisa Sisifo, faafetai tele o lau pule lea. Tautai a'e malo le tau. Tofaina ia oe le uso, inā alu ia ma le manuia o loo faatali mai lou Matai Sili i le Lagi.

*Pati Crichton, FS  
EFKS Aleisa Sisifo, FALEATA.*

## **TAUMALUALUAUPUOSAMOA**

### **VAELE KITIONA MEYER**

**29/8/1924 - 13/4/2020**

Na soifua mai le tina matua i le aso 29/8/1924, ae valaaau le Atua ma faamanava ana feau i le aso 13/4/2020, ina ua 95 tausaga ma masina le matua o le soifua. E faapea le tala a lona aiga, na fanau le tina i le taimi ua taumalualua ai upu o Samoa, ma o le mafuaaga lea o lona suafa, peitai ua iloa lava o ia i lona Suafa o Taumalua, poo Malua. Na faaipoipo le tina ia Taumalua ia Samoa Manoo o Samatau, o le Faifeau Samoa ma sa fai i laua ma faiaoga i le aoga Faamasani sa i Nuuausala, o le pine o lea galuega o le tasi o le fanau na soifua mai ai i lea nofoaga, ma faaigoa ai ia Nuuausala. Na maliu le Faifeau ona toe foi mai lea i lona aiga i Laulii ma toe faaipoipo ai ia Vaele Kitiona Meyer, ma galulue ai i le ekalesia i Laulii i le tofi tiakono mai le tausaga e 1942 seia oo ina tuumalo le tamā o le aiga i le tausaga e 1998.

O ona toe sauniga sa faia lava i lona aiga i Taiasina i Laulii, ona o nei foi aso o i ai i Poloaiga o Faalavelave Faafuasei, ua tapu ai ni potopotoga ma ni faatasiga e oo lava i tapuaiga. Sa fa'aao gaina lava auala o fesootaiga televavave i nei ona po ma maimoa mai ai fanau a le tina ia Taumalua ma ona aiga i atunu e mamao o tagi mai ala ona ua faigata femalagaiga i nei aso. Na matou matamata atu a o saunoa tuusao mai fanau mai Niu Sila ma Ausetalia i molimau o le tina i le aso o lona toe sauniga, faapei lava o lea matou te faatasi ai iinei. Sa molimau le fanau ia Lusi Maposua (Samoa), Siniva Sau (Niu Sila), Afiofa Mahe, Tuautu Ieremia, Vaele Aperaamo (Ausetalia uma), Amosa Vaele ma

## **TAUMALUALUAUPUOSAMOA VAELE KITIONA MEYER**

Puataunofo K Matamu ma Selia Tuifua (o i Samoa uma). Sa auga uma lava molimau i le tina o se tina alofa, loto maulalo ma agamalu. O lea foi le molimau a le Afioga i le Faamasino, le susuga i le Aoao Fesoasoani ia Tuautu Kalepo na fai ma sui o lona aiga. Na taua ai foi o le toe tagata lea o le aiga ma le nuu e oo foi i lenei aulotu, sa fai lava ma vaaiga i lona aiga, e le manao i se mea e faaletonu, ma o lana tatalo foi na manuia ai le aiga. Sa saunoa foi 1e Afioga ia LeniuVainiu Teo, o le Sa'o o lenei nuu ma maua ai lava foi uiga o le tina e pei foi ona taua i molimau a le fanau, aua sa soifua ae i lenei nuu ma mafuta ma nisi o fanau a le tina ma silafia ai o ia. O le afioga ia Fuamatu Tumua na fai ma sui o le mafutaga a tina i lenei aulotu ma ia taua ai galuega lelei a le tina sa tautua ai i galuega ma matafaioi faatina i le ekalesia.

O le molimau a le faifeau na faa-autu i upu o le Salamo 92:12-14, “*E tupu olaola le tagata amiontonu e pei o le pama, e tupu tele e pei o le arasi o Lepanona. O e ua totoina i le fale o le Alii, e tupu olaola i latou i le lotoa o le Atua. E oo ina ulu sinasina, latou te fua mai pea lava, e malolosi ma lauolaola i latou*”.

Aua lava foi e oo mai lava ina valaau le Atua, o galue lava i le ekalesia i lona matafale-lotu. E faia mea uma lava, e leai se mea e fai i le ekalesia e faatamala ai le tina ma le fanau, e oo foi i le suavai e fu'e mai mo lo matou aiga i Aso Sa taitasi e oo mai lava ina valaau le Atua. E fiafia e talanoa aua sa matua malamalama lona mafaufau e ui ua fai ma tagata matua, e oo i lana faitau tusi e faitau e aunoa ma le fa'aaogaina o se vaaiga. O le

uiga lava lea o le manatu o le Fai-Salamo, e ui ina ulu sinasina e fua mai lava, auā sa totoina i le fale o le Alii ma ola i le lotoā o le Atua. Auā o le laau o le pama e foliga o ona aso lelei ia o aso ua matua e fua mai ai se fua e oo lona mamafa i le va o le 300 ma le 600 pauna. Faatusaina lava foi i le laau o le pama le tagata amiontonu, auā e lē pei lana ola o le ola o isi laau e faapi' opo'i le la ma felefele solo, ae tupu faasasa'o lava i luga. O uiga lava ia sa maua i le soifua o le tina, ma e faafetaia ai le Atua ona o le tina ia Taumalua, o se meaalofa aogā i lona aiga, lona nuu ma lana ekalesia. Tele lava tamaoaiga o le Atua sa ia faasoa mai mo i matou foi ma lenei galuega. O a'u lava foi na ta'ita'i i ona sauniga i lona tuugamau, ma matou faamavae atu ai i le pese faa-tofa a le au Kerisiano. Amuia lea auauna, auā e valaau mai lona Matai, a o loo faapea ona fai. Tofa Tina, manuia lau malaga.

*Pita Toleafoa FS,  
EFKS Laulii, APIA SASA'E.*

## **ULUGIA ELIAPO MAPUSAGA**

**19/12/1943 - 9/4/2020**

O Ulugia Eliapo Mapusaga o se alii tiakono ma se tamā matua o lenei Ekalesia i Nuufou Faleata. Sa faaipoipo ia Pasene, (tama'ita'i tausi soifua faau'uina a le Malo Samoa) i le aso 25 Mati 1971; ma e 10 le la fanau, 38 fanau mai le la fanau, toa 8 fanau a fanau mai le la fanau. O faamanuiaga ia mai le Atua mo si o la aiga - o le toatele o fanau sa tutupu ma ola mai ia te i la'ua. O ia e mai le nuu o Vaigaga

ma Vaiusu i Faleata, a o Pasene e mai Savaia Lefaga; ua avea i la'ua ma le fanau ma tagata nofo mau i Vaitele-fou e ala i lo la fasi fanua ½ eka o loo faamautū ai nei. O se tasi o tiakono faavae o lenei Ekalesia ina ua faavaeina i le aso 04 Novema 2012 i lalo o le Polokalame faa-Misionare a le Ekalesia. O lo la fale sa ofoina mai e avea ma nofoaga e faamaopoopo ai le tau amataina o le lotu e ala i fonotaga ma a'oga pese sa faatinoina ai, ao tapena lo matou fanua i Nuufou nei mo le uluai sauniga lotu e faapaiaina ai le eleele faatasi ma le tatala aloaiaina o le faatuina o le Aulotu.

Ina ua agi le afā o Heta ia Tesema 2012, sa lē mafai ona faia la matou lotu i fale tapoleni sa tu i le fanua i le Aso Sa sa sosoo ai ona sa faaleagaina ia fale tapoleni i le matagi. O lo la maota i Vaitele-fou sa faataunuina ai lea sauniga lotu. E manatua pea lenei tamā i ana galuega lelei sa faia i le tau amataina o le galuega. E 'aifilofilo lava i la'ua ma se tasi foi tamā matua, le alii tiakono ia Loli Amituana'i Ropati Matia i le faamaopoopoia o le Aufaipese i lena vaitaimi. O se tamā e fiafia tele e galue fanua e ala i mea totō i se tasi o ½ eka a lona aiga; ma o lona toaga lea faa fai faatoaga sa molimauina i le faamamāina o le fanua tele o loo tu ai nei le lotu. O ia ma si ona faletua ma le la fanau tamaita'i e to'alu, sa nafa lava ma le tapenaina o le fale lotu i ulua'i taimi sa faia ai a matou sauniga lotu i le maota o le galuega i Nuufou.

## ULUGIA ELIAPO MAPUSAGA

E lē lagona lona leo i upu fai ma tonu fai o le aulotu ona o ia o se tamā toafimālie ma agamalū ae molimauina pea le leo tele o ana galuega i mea na te faatinoina mo le manuia o le Aulotu. O la'u asiasiga ia te ia ma lona aiga i le Aso Toonai, 21 Mati 2020, sa faate'ia ai a'u ina ua ou oo atu i lona maota o loo taoto mai ua gasegase, ao se tamā malosi ma to'aga e galue i lona fanua. O lona gasegase lava lea sa si'itia ai i le Falema'i i Motootua ma taofia ai o ia, mulimuli ane ona faamaonia lea ua leva ona maua o ia i le Kanesa ma ua i le tulaga 4 (stage four). Sa te'a mai i tua ina ua lē aogā i ai se togafiti. O le Aso Tofi, 09 Aperila 2020 i le itula e 03.45 i le vaveao sa logoina mai ai e Pasene ua maliu le tamā o le aiga. Sa ou oo i ai ma fai la matou faigalotu ma ave ai loa lona tino maliu i le Maota maliu o le falemai i Motootua e taoto ai.

Ua maliu tonu le alii tiakono i le taimi o le tapu a le Malo (State of Emergency) ona o le faama'i oti o le COVID-19. Ua fai ma mafuaaga ua na o a'u ma lo'u to'alua, ma le Faifeau Nofoaiga ia Iamafana Faauuga (FS) sa matou o i le aveeseina mai o lona tino maliu mai le fare maliu i le 7.00 i le taeao o le Aso Toonai, 18 Aperila 2020. Sa na o le tatalo lava sa faia i le fare maliu; ona matou o mai lea ma lona sa i lona maota i Vaitele-fou ma fai ai le Sauniga faamavae ia te ia. O a'u lava sa

ou ta"ita'i, faitau Tusi Paia le A'oa'o ia Foaimea Tavita (AF). Sa molimau le tinā ia Pasene, si ona uso ia Ulugia Ma'ima'i (AF) ma le tamā o le aiga i Vaigaga, le tofa ia Ulugia Toese faapea se tasi o ona tuafafine. O Peseta Maelega Tuisalega (AF) sa faia le tatalo. O le upu faamafanafana sa saunia e I'amafana Faau'uga (FS), a o le molimau faaleagaga i lona soifua galue i le galuega a le Atua, sa ou faia lea faatasi ma la'u foi upu faamalosi'au i le tinā, le fanau ma le aiga.

O ona toe sauniga sa faataunuina lava lea i lona oliolisaga tumau i lona fanua i Vaitele-fou, ma sa ou ta'ita'iina foi. Ona matou faamavae atu lea ia te ia i le pese masani Pese 268, 'Talofa, uso e tofaina oe.' Tofa Ulugia. Tofa loa. O upu lava a le tiakono ina ua ou fesiliglia lona lavātia ona tatali tiga o le gasegase ona o se ma'i ua ou iloa le tigaina, fai mai lana tali faamama'i, "E lē taitai ona faatusalia o'u tiga ua i ai nei ma tiga sa feagai ma lo'u Alii o Iesu ao faasatauroina o Ia mo le faataunu'uina o lo tatou faaolataga." Amuia oe Ulugia ua e oti i le oti a le Kerisiano faamaoni ma ua e foi i lou Matai i taimi tonu o le vaiaso paia o le Alii. Ia manuia lau malaga. Alofaaga mai ia te au nei faapea la tatou Aulotu ua lē mafai ona auai atu i lou toe sauniga ina sei o latou faatofa atu i lau susuga i le alii tiakono.

*Letaulau Aloiai Poufa-Pesaleli (FS). EFKS Nuufou, FALEATA.*  
.....


## AMUIA E FAANOANO...

"Ua tagi Iesu." Ioa.11:35.


O le faanoanoa o le tau lea tatou te totogi mo le alofa. O le tele o lou alofa mo se tasi, o le tele foi lea o lou faanoanoa pe a maliu o ia. O le te'i, lē talitonu, lē mautonu, fememea'i, faavaivai, gaogao ma le ita, o faatinoga uma o le faanoanoa. Ina ua taunuu Iesu i le pale o Lasalo ua atoa le fa aso talu ona maliu lana uo; ua ita ai lona tuafafine o Maretā. Sa ia fia iloa pe aiseā na lē vave alu atu ai o Ia, pe laveaiiina foi le oti o le tuagane. 'Aisea, le Alii e?' O se fesili tatou te taumafai e saili se tali pe a uftia i tatou i le faanoanoa. O le a le tali atu a Iesu? Ina ua silafia e Iesu o Maria ma isi tagata o fetagisi i le faanoanoa, ona ia faanoanoa foi lea ma tutulu. Ma ina ua fai faapea e Iesu, ua Ia ta'u mai ai mo i tatou, e leai se afaina, e leai se mea e faasā ai, ae mafai foi ona tatou faanoanoa ma fetagisi. E tagi o ia i taimi uma tatou te fetagisi ai. O loimata e lē o le fa'aaliga o le leai o se faatuatua; ae o lona uiga e ta'u atu ai o tatou lava o tagata ola. O Le na aumai le lagona e alofa ai, o loo malamalamā lelei foi o Ia i le faanoanoa ma le to'esea, o le ala lena o Lona aumaia o loimata. E faapefea ona tatou faanoanoa? O le tele o taimi e fai ma le tete'e e lē fia taliaina; e fai ma le ita ma loto tiga, taumafai e faafesootai pe aiseā ua faapea ai, tatou te tauivī e ala i auega seia oo ina mapu ua aulia le to'afilemū, ma taliaina ai le mea ua tupu. Peitai o le taliaina o le mea ua tupu, e lē o lona uiga ua faiaina i le leai o se faamoemoe, ae o le taliaina o le pule a Le ana i tatou, ma ua tatou talitonu e moni lava ua faaumatiā le oti i le manumalo.

.....

# ATA O E UA FAI I LAGI




APE STEHLIN



TAVEUVEU ALO  
TAGALOASA



TAUMALUALUAUPUOSAMOA  
VAELE KITIONA MEYER



ULUGIA ELIAPO  
MAPUSAGA